



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

03 Juñu 2014

**Tribunál Distritál Suai julga kazu violénsia doméstika 21 hosi kazu 42 liuhosi
Tribunál Movel iha Distritu Bobonaro**

Iha loron 28 too 30 Maiu 2014, Tribunál Distritál Suai kontinua hala'o julgamentu movel iha Distritu Bobonaro no julga kazu hamutuk 42.

Kazu 42 ne'e kompostu husi kazu krime 39 no kazu sivíl 3. Kazu krime sira involve krime ofensa ba integridade fízika simples 4, violénsia doméstika 21, violasaun seksuál 4, koasaun seksuál 1, abuza seksuál ba menór 1, ameasa 2, danu agravadu 1, furtu agravadu 1, ofensa ba integridade fízika grave 1, omisídiu negligente 1, kontra flora no fauna 1, kazu danu simples 1. Entretantu kazu sivíl involve disputa rai 1 no rua seluk kona-ba alimentasaun.

Iha julgamentu movel ne'e, tribunál movel konsege konklui kazu 30 hosi kazu 42 ne'e no restu kazu 12 mak sei kontinua prosesu.

JSMP observa katak kazu sira ne'ebé julga liuhosi tribunál movel ne'e maioria involve krime violénsia bazeia ba jéneru (kazu 27 hosi total kazu 42 ne'ebé julga). Ne'e númeru ida ne'ebé significativu tebes durante loron tolu nian laran. Kuaze rezultadu monitorizasaun JSMP nian hatudu katak kazu sira ne'ebé julga iha tantu tribunál movel ka tribunál permanente sira sempre barak liu mak krime hasoru fetu no labarik.

“JSMP hein katak atraves hosi julgamentu movel iha área rural sira ne'e nu'udar forma ida atu hasae konsensia publiku kona-ba violénsia doméstika no krime kontra fetu hanesan krime publiku no se mak komete krime hirak ne'e simu responsabilidade tuir krime ida-idak nia natureza no gravidade,” dehan Luis de Oliveira Sampaio, Diretór Ezekutivu JSMP.

Nune'e mós, ho programa julgamentu movel ne'e, JSMP hanoin katak aleinde bele reduz númeru kazu pendente sira, kontinua hakbesik justisa ba povu iha área rural, tribunál movel mós bele iha implikasaun sosial boot liu atu prevene violénsia bazeia ba jéneru liuhosi kondensasaun ne'ebé apropiadu ba krime sira ne'e.

Julgamentu movel ne'e prezide husi juis koleтиву ne'ebé kompostu husi Dr. Alvaro Maria Freitas Dr. Costânsio Barros Bâsmery, Dr. Argentino Luisa Nunes, Dr. Pedro R. de Figueiredo no Dra. Florencia Freitas. Ministériu Públiku representa husi Dra. Benvinda da Costa do Rosario no Dr. Antonio da Silva Tavares no arguidu sira hetan defeza husi Dr. João Henrique de Carvalho no Dr. Manuel Amaral husi Defensória Públiku.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
telefone: 3323883/77295795
webiste: www.jsmp.tl
facebook www.facebook.com/timorleste.jsmp
twitter: @JSMPtl